



ACTA DA SESIÓN ORDINARIA DO PLENO DA CORPORACIÓN REALIZADA O 30 DE NOVIEMBRE DE 2016.

Concelleiros asistentes:
D. Manuel González López
D. Julián Ramón Seijas Criado.
D^a. Esperanza Gayoso Pereiro.
D. Javier Fernández Brage
D. Delfín Feal Pereira.
D^a. Concepción Rodríguez Ferreiro
D. Iago Varela Martínez.
D^a. María Eva García Amor
D. Xosé Manuel Pérez Sardiña

No salón de sesións da Casa do Concello de Cabanas, sendo as dezanove horas e trinta minutos do día trinta de novembro de dous mil dezaseis, en primeira convocatoria e baixo a presidencia do Sr. Alcalde Germán Castrillón Permuy, coa asistencia dos Sres. Concelleiros relacionados á marxe e do Secretario titular Antonio López Vila, reúnese o Pleno da Corporación en sesión ordinaria segundo a convocatoria remitida ao efecto.

Unha vez comprobada a existencia de quórum para a válida constitución do Pleno, a Presidencia declara aberta e pública a sesión, procédese a trata-los asuntos incluídos na Orde do Día.

Non asiste o concelleiro Carlos Ladra Brage.

1.- APROBACIÓN SE PROCEDE DE ACTA DE SESIÓN ANTERIOR. Dáse conta da acta da sesión realizada o día 30 de agosto de 2016, da cal entregouse copia coa convocatoria a tódolos concelleiros; o Sr. Presidente pregunta se algún membro da Corporación ten que formular algunha observación, e non presentándose alegacións, o Pleno da Corporación en votación ordinaria, co voto a favor dos dez membros presentes dos once que o compoñen, acorda aproba-la referida acta.

2.- EXPEDIENTE MODIFICACIÓN DE CRÉDITOS 10/2016.. Examinada a proposta de modificación de créditos que se detalla na memoria da Alcaldía-Presidencia, por importe de 313.790,00 euros, para facer fronte a gastos a cargo desta Corporación relativos a persoal, bens correntes e servizos, e investimentos, para os que non existe crédito ou é insuficiente no orzamento vixente, e que considera necesario realizar no presente exercicio sen que se poidan atrasar para o exercicio seguinte, utilizando como recursos para o seu financiamento as baixas doutras partidas de gastos e remanente de tesourería, estimando que as modificacións son necesarias con carácter inaprazable e non existe ningún prexuízo para os intereses do Concello.

No expediente inclúense informes de Intervención coas correspondentes consideracións, así como ditame favorable da Comisión de Facenda.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro D. Delfín Feal Pereira indica que o asunto xa foi tratado na Comisión de Facenda e solicitaron aclaracións sobre unha serie de gastos como actividades deportivas e outros, considera importante incrementar o gasto para formación do persoal do Concello que é sumamente necesario, haberá que facer fronte agora a outros gastos que é necesario reducir como reparación de maquinaria.

Polo grupo Míxto: o concelleiro do BNG Iago Varela Martínez considera que esta modificación ben a darlle a razón cando na aprobación dos orzamentos dicía que eran irrealis e



inaprobables, cita o exemplos o incremento en limpeza e ademais que se faga con empresa privada, traballos do plan xeral sen telo adaptado a nova lei do solo e incremento de 10000 euros para campamento de verán que estima excesivo, pero a sorpresa desagradable é que estes cartos saian de prazas de persoal que non se cubriron e xubilación preguntando si creen que as condicións de traballo dos traballadores/as municipais son axeitadas?, si consideran que non é preciso ter máis persoal para atender á veciñanza con xeito? , e si creen que é mellor non sacar as prazas vacantes e darlles os cartos a empresas privadas con contratos menores, a dedo?, polo tanto non poden votar a favor destes cambios.

A concelleira de AEC María Eva García Amor é consciente do complexo e laborioso que pode ser facer unha previsión de gastos nos orzamentos para todo o ano, poden xurdir imprevistos en diversas partidas que é necesario compensar a finais de ano como sucede na maioría dos concellos, a situación xa está prevista legalmente que permite facer estas modificacións, é verdade que podíase haber aforrado nalgunhas partidas, as prazas vacantes podíanse haber convocado con tempo suficiente e non sería necesario acudir a empresas externas que encarecen o servizo.

O concelleiro de PDDdG Xosé Manuel Pérez Sardiña refírese ao dito na Comisión de Facenda, alerta sobre a privatización de servizos, cartos destinados a prazas que están vacantes van a engordar pingües beneficios de empresas ao servizo do Sr. Alcalde, hai que facer o traballo doutra maneira e non como se fixo no parque do Areal cun contrato que realizaron en catro horas, está sen cubrir a praza de operario servizos múltiples, a de encargado, policía local, etc., increméntase a partida para ampliar o contrato ao redactor do plan xeral, entende que o seu traballo no está sendo o correcto que debería, alude ao informe desfavorable do Director General de Carreteras do Estado, e non é de recibo ampliarlle o contrato pois non está tendo máis que informes desfavorables, ademais vaise facer a dedo, polo tanto o seu voto será en contra, tamén ve insuficiente a dotación do Penso.

Polo grupo Popular: o Sr. Alcalde agradece que o Sr. Feal Pereira sexa consciente de que hai que facer modificacións de crédito, é lóxico mellorar a preparación do persoal; se non temos limpadora hai que ampliar a partida, non foi posible sacar antes esas prazas pero está en vías de solución, no relativo a actividades deportivas xa se explicou na Comisión de Facenda, fíxose a ludoteca e o campamento de verán cun éxito extraordinario e non se pode deixar de facer, a falta de consignación nesa partida foi por motivo da subvención que non saíu no prazo previsto; non se privatizou ningún servizo desde o 2007, si algún hai privatizado xa estaba antes, este goberno está por sacar as prazas que os laborais nunca tiveron asignada, alguén que falou agora non fixo nada en épocas anteriores; en canto ao PXOM cambiou a lei do solo e hai que adaptalo, iso non estaba contratado, e sobre o informe de Fomento vai levar vostede unha sorpresa porque estes días chegará o documento oficial favorable, o erro foi da Demarcación de estradas do Estado que non miraron os planos que tiñan que mirar; a consignación para o Penso considérase suficiente a dotación que se propón e senón tampouco habería problema porque inda temos remanente positivo; cre que se está a facer unha boa xestión, ademais é a primeira modificación porque as outras foi por ampliación de partidas, gustaríalle saber que concellos non fixeron modificación a esta data.

O Sr. Feal Pereira indica que as baixas para financiar estes cambios veñen desas partidas de funcionarios e laborais que non están cubertas, recorda a moción presentada a finais de 2015 para consolidar postos de traballo sobre a que houbo polémica, a partir diso sacouse a praza de



administrativa e agora hai unha nova oferta de emprego público, agora esas partidas úsanse para suplementar outras que se deben aquilatar os gastos o máis posible para cando se cubran as prazas.

O Sr. Varela Martínez aclara que privatizar é non sacar conscientemente prazas que están consignadas no orzamento, sabíase que había que sacalas e durante todo o ano non se sacaron e danlle os contratos a unha empresa privada para que faga os servizos por non contratar persoal.

A Sra. García Amor aclara que o tema da consolidación non equivale a cubrir as prazas por xubilación.

O Sr. Pérez Sardiña manifesta que non convocaron este ano a praza de limpadora e recórdalle que nada máis entrar como alcalde eliminou o posto de limpadora do colexio de San Martiño, iso é privatizar, contratar unha empresa para a limpeza do concello é privatizar, é externalizar servizos e darlle os traballos aos amigos; acaba de recoñecer que o Penso ten partida insuficiente, pois entón dótena xa que polo visto van prorrogar os orzamentos dado que non se sabe cando os van aprobar, e sobre o PXOM insiste no informe de Carreteras do Estado que xa se viu o problema, a sorpresa igual a leva o Alcalde.

O Sr. Alcalde sinala que cando chegou a Alcaldía xa estaba contratada unha empresa e séguese con ese sistema; sobre o Penso non dixo que non chegaba a partida, senón que entende que é suficiente; e no referente ao PXOM vaia ver vostede o informe de Carreteras e si xa o veu non ten nada que dicir.

Despois de debatido o asunto o Pleno da Corporación en votación ordinaria con seis votos a favor dos membros do grupo Popular e concelleira de AEC, dous en contra do concelleiro do BNG e do concelleiro de PDDdG, e dúas abstencións dos membros do grupo Socialista, acorda:

Primeiro: Aproba-la referida proposta de modificación de crédito aplicando as cantidades correspondentes as partidas que se reflicten na memoria segundo o seguinte detalle:

1º.- AUMENTOS PARTIDAS DE GASTOS.

a) Créditos extraordinarios

Partida	Denominación	Consig.antes expediente.	Aumento proposto	Consignación resultante
1601.61904	Infraestructura saneamento	0,00	15.000,00	15.000,00

Suma créditos extraordinarios.....15.000,00 euros.

b)Suplementos de crédito:

Partida	Denominación	Consig.antes expediente.	Aumento proposto	Consignación resultante
1300.21400	Vehículos transporte servizos municipais	500,00	500,00	1.000,00
1500.21300	Maquinaria e ferramentas servizos	25.000,00	8.000,00	33.000,00
1500.21400	Vehículos transporte servizos municipais	1.000,00	1.000,00	2.000,00
1500.22199	Outras subministracións	4.000,00	2.000,00	6.000,00
1500.22700	Limpeza e aseo	1.000,00	6.000,00	7.000,00
1500.23120	Do persoal non directivo	550,00	650,00	1.200,00
1511.22706	Estudos e traballos técnicos	30.000,00	9.160,00	39.160,00
1511.69901	Execución sentenzas O Penso	801.454,50	225.000,00	1.026.454,50
1700.22500	Tributos estatais	500,00	100,00	600,00
1700.61999	Outros investimentos	37.414,95	3.665,00	3.745,16



CONCELLO
DE
CABANAS

2311.16000	Seguridade Social	28.900,00	1.170,00	30.070,00
2410.13002	Outras remuneracións	8.974,00	40,00	9.014,00
3300.13000	Retribucións básicas	14.082,00	100,00	14.182,00
3411.22609	Actividades deportivas	39.484,66	10.000,00	49.484,66
4321.13103	Laboral temporal, turismo	5.445,00	125,00	5.570,00
4321.16000	Seguridade Social	1.715,00	115,00	1.830,00
4321.64000	Gastos en estudos e traballos técnicos	4.235,00	1.815,00	6.050,00
9121.23300	Membros da Corporación	55.000,00	3.000,00	58.000,00
9200.16200	Formación e perfeccionamento do persoal	2.500,00	2.000,00	4.500,00
9200.12006	Trienios	10.515,00	50,00	10.565,00
9200.21600	Equipos proceso información	7.000,00	2.000,00	9.000,00
9200.22001	Prensa, revistas, libros e outras publicacións	6.000,00	1.300,00	7.300,00
9200.22103	Combustibles e carburantes	6.000,00	1.000,00	7.000,00
9321.22708	Servizos recadación a favor entidade	55.000,00	20.000,00	75.000,00

Suma suplementos de crédito.....298.790,00 euros.

Total incrementos de crédito.....313.790,00 euros.

2º.- FINANCIAMENTO

a)Baixas en partidas de gastos.

Partida	Denominación	Consig.antes expediente.	Crédito dispoñible	Baixa proposta	Consignac.. Resultante
1300.12003	Soldos subgrupo C1	17.455,00	10.182,70	8.000,00	9.455,00
1300.12100	Complemento destino	9.570,00	5.582,60	4.500,00	5.070,00
1300.12101	Complemento específico	14.447,00	8.719,09	6.000,00	8.447,00
1300.16000	Seguridade Social	14.000,00	8.153,20	6.000,00	8.000,00
1500.13000	Retribucións básicas	114.865,00	46.061,09	24.500,00	90.365,00
1500.13002	Outras remuneracións	64.916,00	24.091,37	13.000,00	51.916,00
1500.16000	Seguridade Social	60.290,00	22.116,31	12.790,00	47.500,00
9200.12003	Soldos grupo C1	17.455,00	6.546,55	3.000,00	14.455,00
9200.12101	Complemento específico	65.384,00	17.449,36	3.000,00	62.384,00
9200.16000	Seguridade Social	46.900,00	15.970,59	8.000,00	38.900,00

Suma baixas partidas de gastos88.790,00 euros.

b)Con cargo ó remanente líquido de Tesourería:

Partida	Denominación	Consig.antes expediente.	Incremento	Consig.resultante
870.00	Partida para gastos xerais	355.169,19	225.000,00	580.169,19

Suma remanente Tesourería225.000,00 euros.

Total financiamento.....313.790,00 euros

Segundo: Continua-la tramitación do expediente con exposición pública en forma regulamentaria a efectos de exame e reclamacións.

Terceiro: No suposto de non presentarse reclamacións contra o mesmo considerarase definitivamente aprobado, debendo cumprirse o trámite de publicación do correspondente resume no B.O.P. e no Taboleiro de Anuncios do Concello.



3.- MODIFICACIÓN ORDENANZA FISCAL DA TAXA POR EXPEDICIÓN DOCUMENTACIÓN DE TENZA DE ANIMAIS. Visto o expediente tramitado para modificación da taxa pola expedición de documentación de tenza de animais (licenza, renovación, inscricións rexistradas, modificación e cancelacións), e da correspondente ordenanza fiscal reguladora, así como, documentación que consta no devandito expediente con informe de Intervención e ditame da Comisión de Facenda.

Na deliberación do asunto prodúcese as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira opina que a subida non é grande pero tampouco ven a necesidade tendo en conta cantidade de animais que se está rexistrando, polo que non sería necesario esa subida, de todos modos van absterse.

Polo grupo Mixto: o concelleiro do BNG Iago Varela Martínez manifesta que os cambios afectan as cotas tributarias do artigo 6 aos cans potencialmente perigosos, a licenza pasa de 15 a 20 euros, a ficha de 5 a 10 euros e a renovación de 9 a 12 euros, tendo en conta que hai 7 cans rexistrados pregúntase si esta modificación é realmente necesaria porque tampouco vai afectar moito aos ingresos deste concello, por elo vanse abster.

A concelleira de AEC María Eva García Amor refírese ao publicado nos medios de comunicación sobre ataques a persoas por cans de raza potencialmente perigosa, a pesar de que a normativa pide unha serie de requisitos como seguro, licenza municipal, levarlos con correa e bozo, non impide que ocorran estes accidentes, hai cantidade de animais de compañía sen ter que optar por este tipo de animais, a modificación da ordenanza non trata de prohibir senón de subir a taxa como medida disuasoria ante a posible proliferación destes animais no noso concello, como medida recadatoria non é significativa pero axuda a ter un concello máis seguro.

O concelleiro de PDDdG Xosé Manuel Pérez Sardiña indica que pediu o estudo económico da taxa na Comisión pois as taxas baséanse sobre o criterio de cubrir o servizo, no expediente non se atopa ningún estudo que xustifique esta suba, a resolución debe ser motivada para que sexa obxectiva e non entre no ámbito da arbitrariedade, sen ese estudo non pode votar a favor.

Polo grupo Popular: o Sr. Alcalde sinala que no referente a parte administrativa esta pequena suba é para equilibrio dos gastos que representa a tramitación administrativa destes expedientes, despois tamén está a medida disuasoria pois cantos menos animais haxa deste tipo mellor será para o concello.

O Sr. Feal Pereira considera que potencialmente perigosos son todos, uns máis e outros menos, como medida disuasoria parécelle algo que non se sostén, si como medida disuasoria falan dun maior control e charlas formativas dos problemas que trae consigo ter eses animais podería ser, entón o incremento solo se podería soste como xa se dixo para manter o equilibrio de gastos, polo tanto seguirán mantendo o sentido do voto.

O Sr. Pérez Sardiña insiste en que no expediente non hai un só informe económico e sen ese informe non pode votar a favor, a falta de inscrición tamén debería estar contemplada, aí e onde se poden tomar medidas disuasorias.

O Sr. Alcalde sinala que se pode dar información para que aquela xente que poida ter un animal perigoso o teña que rexistrar, xa están obrigados por lei, pero desde o concello se pode sacar algún comunicado.



Debatido o asunto o Pleno da Corporación en votación ordinaria con seis votos a favor dos membros do grupo Popular e concelleira de AEC, un en contra do concelleiro de PDDdG, e tres abstencións dos membros do grupo Socialista e concelleiro do BNG, acorda:

1.º.–Aprobar provisionalmente a modificación do tributo local: taxa pola expedición de documentación de tenza de animais, así como da correspondente ordenanza fiscal reguladora.

2.º.–Someter a información pública o referido acordo e o texto da ordenanza reguladora polo prazo de trinta días a través de anuncio que se publicará no Boletín Oficial da Provincia e no taboleiro de anuncios da Casa do Concello.

3.º.–No caso de que non se presentaren reclamacións no prazo anterior, o acordo adoptado entenderase definitivamente aprobado.

4.- ESCRITO DIRECCIÓN XERAL DE POLÍTICA FINANCEIRA E TESOURO SOBRE ELABORACIÓN PLAN ECONÓMICO FINANCEIRO. Visto o escrito que achega a Dirección Xeral de Política Financeira de data 29 de setembro de 2016, sobre a obriga de elaboración e aprobación dun Plan económico-financeiro do Concello de Cabanas, como consecuencia do incumprimento da regra de gasto na liquidación do ano 2015, de cuxo incumprimento informouse ao Pleno da Corporación en data 25 de maio de 2016, reiterando a obriga de elaboración e aprobación dun PEF que debe ser realizado e remitido a través da aplicación PEFEL2, habilitada na Oficina Virtual de Coordinación Autonómica e Local para elaboración e remisión destes plans, ao mesmo tempo advirte que se no prazo de 15 días naturais non se cumpre coa obriga poderase proceder a adoptar medidas previstas na Lei orgánica 2/2012, do 27 de abril.

Vista a proposta da Alcaldía, na cal da conta que o incumprimento da regra de gasto débese a unha contía mínima de 28.872,80 euros, cumpríndose coa estabilidade orzamentaria e o límite da débeda, ademais o resultado orzamentario é positivo e un remanente de tesourería positivo de 320.466,89 euros despois do desconto para reservas, por elo considera que sería suficiente con declarar non dispoñible a mesma contía de gastos no orzamento actual que está nivelado, segundo o seguinte detalle:

Partida	Denominación	Consig. antes expediente.	Crédito dispoñible	Baixa	Crédit. Disp. resultante
1710.60999	Outros investimentos	11.050,00	11.050	11.050,00	0,00
4541.61903	Infraestrutura viaria municipal	106.344,72	67.689,54	7.822,80	59.866,74
4221.61906	Mellora infraestrutura parques empresariais	150.999,72	150.999,72	10.000,00	140.999,72
Total baixas de créditos dispoñible.....				28.872,80 euros.	

Visto o disposto no artigo 21 e 23 da Lei Orgánica 2/2012, de 27 de abril, de Estabilidade Orzamentaria e Sustentabilidade Financeira, en relación co artigo 9.2 da Orde HAP/2105/2012, de 1 de outubro, pola que se desenvolven as obrigacións de subministración de información previstas na Lei Orgánica 2/2012, de 27 de abril, de Estabilidade Orzamentaria e Sustentabilidade Financeira.

Na deliberación do asunto prodúcense as intervencións coas opinións que de forma sintetizada se recollen a continuación:



Polo grupo Socialista: o voceiro Delfín Feal Pereira opina que a proposta da Alcaldía deixa de executar investimento viario pero hai cumprir o que se require, pero pide que este investimento quede priorizado para os seguintes investimentos.

Polo grupo Mixto: o concelleiro do BNG Iago Varela Martínez considera este punto consecuencia da “lei Montoro” que provoca perda de autonomía e obriga a presentar este plan, o goberno municipal sabe da obriga de presentar o PEF e non o fixo, tráeno agora cando ameazan con medidas coercitivas, a última hora e con presas, deben reflexionar sobre a maneira de traballar.

O concelleiro de PDDdG Xosé Manuel Pérez Sardiña estima traen isto a pleno porque xa llo reiteran e ameazan con medidas coercitivas, estima que en 2015 como ano electoral gastouse con alegría como xa dixo cando foi a aprobación da conta xeral, houbo moito gasto en cemento antes das eleccións cunha política caciquil, non está de acordo en reducir en investimentos, xa dixeron que hai partidas superfluas das que se está abusando.

Polo grupo Popular: o Sr. Alcalde indica que non se cumpre este parámetro, pero se cumpre cos outros requisitos esixidos, tampouco é complicado o axuste cando se fai a primeira modificación orzamentaria en novembro, estas partidas que se modifican corresponden a achega para unha subvención que non veu, solo hai unha mínima parte que afecta a investimento, polo tanto non ve ningún problema a esta solución; considera que o Sr. Pérez Sardiña está equivocado co da política caciquil, están a traballar para mellorar os servizos aos veciños, ao mellor na súa época o facían así, pode haber erros pero estanse a facer moitas cousas.

O Sr. Pérez Sardiña alude a compra de sacos de cemento arredor das eleccións e os gastos que constan na conta xeral de 2015, que deben explicalo.

O Sr. Alcalde indica que unha das cousas que fan e explicar a xente o que se está a facer, e si vostede pide algo razoable como veciño tamén están dispostos a facelo, para arranxos de baldosas que se levantan, soportes de contedores, etc, é necesario cemento para suxeitalos.

Debatido o asunto o Pleno da Corporación en votación ordinaria con seis votos a favor dos membros do grupo Popular e concelleira de AEC, dous en contra do concelleiro do BNG e do concelleiro de PDDdG, e tres abstencións dos membros do grupo Socialista, acorda:

Primeiro.- Tomar coñecemento do escrito da Dirección Xeral de Política Financeira de data 29 de setembro de 2016, sobre a obriga de elaboración e aprobación dun Plan económico-financeiro do Concello de Cabanas.

Segundo. Aprobar a proposta da Alcaldía, para dar cumprimento como Plan económico-financeiro, ao incumprimento da regra de gasto en 2015, declarando como crédito non dispoñible a contía de 28.872,80 euros nas partidas de gastos do orzamento vixente financiadas con fondos propios, segundo o seguinte detalle:

Partida	Denominación	Consig. antes expediente.	Crédito dispoñible	Baixa	Crédit. Disp. resultante
1710.60999	Outros investimentos	11.050,00	11.050	11.050,00	0,00
4541.61903	Infraestrutura viaria municipal	106.344,72	67.689,54	7.822,80	59.866,74
4221.61906	Mellora infraestrutura parques empresariais	150.999,72	150.999,72	10.000,00	140.999,72
Total baixas de crédito dispoñible financiado con fondos propios				28.872,80 euros.	



5.-ACTUACIÓNS URXENTES PARA MELLORA SEGURIDADE ESTRADA DO BARREIRO DP-1502 E ANEXAS. PROPOSTA DO CONCELLEIRO DO BNG . Vista a moción presentada polo concelleiro do BNG sobre actuacións urxentes para a mellora da seguridade na estrada do Barreiro DP-1502 e Anexas, en cuxa exposición de motivos fai referencia a que se trata da estrada provincial que máis tráfico soporta no concello de Cabanas, comunicación parroquias de Laraxe e Porto, así como acceso ao CEIP Eladia Mariño, considera como chapuza electoralista os traballos levados a cabo pola Deputación Provincial na pasada lexislatura, citando algúns problemas como rotura tapas de saneamento, riadas de terra, inundacións fecais, ao que hai que sumar a mala sinalización.

Por todo elo propón ao Pleno a adopción dos seguintes acordos:

1. Solicitar a instalación dun sinal vertical de intersección na estrada DP-1502 que indique o cruce co Camiño da Escola en sentido subida, e outro en sentido baixada.
2. Solicitar a instalación dun sinal vertical de intersección na estrada DP-1502 que indique o cruce coa Travesía do Barreiro 1 en sentido subida, e outro en sentido baixada.
3. Solicitar a instalación dun sinal vertical de intersección na estrada DP-1502 que indique o cruce co Camiño do Salgueiral en sentido subida, e outro en sentido baixada.
4. Solicitar a instalación dun sinal vertical de intersección na estrada DP-1502 que indique o cruce coa Travesía do Barreiro 2 en sentido subida, e outro en sentido baixada.
5. Solicitar a instalación dun sinal vertical de intersección na estrada DP-1502 que indique o cruce co Camiño Val de Abaixo en sentido subida, e outro en sentido baixada.
6. Solicitar a instalación dun sinal vertical de intersección na estrada DP-1502 que indique o cruce co Camiño Val de Arriba en sentido subida, e outro en sentido baixada.
7. Solicitar a instalación dun sinal vertical de intersección na estrada DP-1502 que indique o cruce co Camiño de Lodeiro en sentido subida, e outro en sentido baixada.
8. Solicitar a instalación dun sinal vertical de intersección na estrada DP-1502 que indique o cruce co Camiño de Pena do Pico (saída inferior) en sentido subida, e outro en sentido baixada.
9. Solicitar a instalación dun sinal vertical de intersección na estrada DP-1502 que indique o cruce co Camiño de Pena do Pico (saída superior) en sentido subida, e outro en sentido baixada.
10. Solicitar a instalación dun sinal vertical de intersección na estrada DP-1502 que indique o cruce co camiño de baixada á Veiga en sentido subida, e outro en sentido baixada.
11. Estudar a redución de velocidade entre o lugar do Val (pouco antes do punto kilométrico 1) e o lugar dos Anidos (sobrepasado o punto kilométrico 2) por baixo de 50 km/hora.
12. Solicitar o pintado dun paso de peóns na Travesía do Barreiro, nas inmediacións do cruce co Camiño do Salgueiral, coa súa correspondente sinalización vertical.
13. Solicitar sinalización vertical e marcado para advertir do perigo no tramo do Camiño de Santiago que transcorre pola estrada DP-1502, entre o camiño de Lodeiro e A Pena do Pico.
14. Solicitar un espello fronte a vivenda número 49 (fronte ao cruce co Camiño de Lodeiro) para facilitar a incorporación á estrada DP-1502.
15. Solicitar o aumento do tramo de quitamedos na curva situada após a saída superior da Pena do Pico.
16. Solicitar sinalización vertical e/ou horizontal de STOP na saída inferior da Pena do Pico
17. Solicitar sinalización vertical e/ou horizontal de STOP na saída do camiño de Lodeiro.
18. Solicitar sinalización vertical e/ou horizontal de STOP na saída do camiño Val de Arriba.



19. Solicitar sinalización vertical e/ou horizontal de STOP na saída do camiño Val de Abaixo.

20. Solicitar sinalización vertical e/ou horizontal de STOP na saída da Travesía do Salgueiral.

21. Solicitar a instalación de sinalización vertical para advertir de zona escolar na estrada DP-1502 ou na estrada do CEIP Eladia Mariño.

22. Solicitar a instalación de bandas redutoras de velocidade nas inmediacións do colexio.

23. Solicitar o arranxo definitivo dos problemas de saneamento para evitar novas inundacións e vertidos de fecais.

Na deliberación do asunto prodúcese as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira manifesta que esta estrada trouxo moitos problemas, a proposta non deixa de ser unha solicitude de melloras de sinalización e seguridade, non sabe si se certifica a súa necesidade pola entidade competente pero cando menos non está mal estudar as súas necesidades.

Polo grupo Mixto: a concelleira de AEC María Eva García Amor entende que haberá un estudo sobre a necesidade real dos sinais, gustaríalle saber si todas son reclamacións veciñais ou algo que se lle ocorreu ao compañeiro, na estrada do colexio non houbo queixa nin accidentes, nos horarios de entrada e saída só se pode circular nun sentido e polo xeral acude a policía local, de todos modos a maioría dos sinais son nunha estrada titularidade da Deputación polo que debería solicitar que os técnicos de dito organismo estuden a posibilidade de colocación dos sinais.

Polo grupo Popular: o voceiro Manuel González López non está de acordo con varios aspectos da exposición de motivos e considera negativa a labor do concelleiro do BNG pois o seu grupo estivo de acordo coa modificación, falta a verdade nas riadas, xa lle explicaron o problema das fecais e a solución, pídlle que diga cando tivo lugar a inauguración da estrada e gustaríalle que valorase o traballo que se fixo nesa estrada e pregunte polas melloras aos veciños que viven na zona; pregunta si esta proposta foi feita por técnico competente, si hai proxecto e si sabe a quen lle corresponde facer a sinalización, indica que hai que ser serios coas propostas, sobre todo cando hai que darlle traslado a outro organismo, o titular da vía é quen ten que facer a sinalización; por outra banda hai unha relación de rúas aprobada polo Pleno que debe respectar, alude a sinalización xa establecida nos accesos ao colexio e limitación de velocidade na travesía do Barreiro, votarán en contra pero si trae unha memoria xustificativa asinada por técnico competente non terían inconveniente en darlle traslado a Deputación Provincial.

O concelleiro do BNG Iago Varela Martínez considera que a Sra. García Amor o mellor non tivo queixa porque vive en Laraxe e non fala cos veciños, algo que é moi saudable; en relación ao voceiro popular, entende por riada auga e terra que se mesturan e baixan pola estrada, e como delegado de obras debería facer unha visita cando chove, a outra voceira do PP, Eva García Amor debería de velo tamén cando baixa de Laraxe, en relación a petición dos veciños falta sinais básicos por exemplo STOP na saída das vías, non recorda a data da inauguración pero ten foto do Sr. Diego Calvo co Sr. Alcalde en día de choiva, nin sequera estaba terminada, non ten problema en instar a Deputación onde cogoberna o BNG para que fagan as cousas da súa competencia, e acusa ao Alcalde de non facer nada ante as denuncias que se presentan.



A Sra. García Amor sorpréndelle que na maioría das mocións o Sr. Varela Martínez pide instar a Xunta, ao goberno da nación, e neste caso cando a maioría das cousas son competencia da Deputación non pon instar a Deputación.

O concelleiro de PDDdG Xosé Manuel Pérez Sardiña non sabe o que lle escriben ao voceiro popular pero escribenlle mal, saben cal é o problema desa estrada que se agravou desde que se fixeron as obras, estas cousas son necesarias pero tamén sería necesario que no entronque de abaixo coa estrada da Xunta non fixeran un quebro a 90 º, son erros de execución como meter un río no saneamento, teñen a responsabilidade de explicalo, non vixiaron as obras e fixeron auténticas tropelías.

O Sr. Alcalde manifesta que a foto non ten data nin nota de prensa porque non houbo inauguración, realizar unha visita a estrada poden facelo como se fixo moitas veces, no relativo a vixilancia, a dirección de obra foi da Deputación; con todo iso si achega unha memoria asinada por técnico competente e con redacción distinta recollendo o nome que corresponde aos rueiros, se lle traslada sen problema a Deputación que como titular da vía correspóndelle a sinalización, si fai iso non teñen inconveniente en votar a favor.

Despois de debatido o asunto, o Pleno da Corporación en votación ordinaria, con catro votos a favor dos membros do grupo Socialista, concelleiro do BNG e concelleiro de PDDdG, e seis en contra dos membros do grupo Popular e concelleira de AEC, acorda rexeitar a proposta presentada polo concelleiro do BNG.

6.- INSTALACIÓN PUNTOS DE CARGA PARA VEHÍCULOS ELÉCTRICOS. PROPOSTA DO CONCELLEIRO DO BNG. Dada conta da moción presentada polo concelleiro do BNG sobre instalación de puntos de carga para vehículos eléctricos na cal fai referencia a aparición de vehículos eléctricos no mercado automobilístico que facilitan a redución de contaminación atmosférica, o que obriga a ver as necesidades xurdidas e buscar solucións en infraestruturas de apoio a esta nova tecnoloxía; tanto os vehículos eléctricos como os híbridos enchufables fan necesario que os edificios e espazos públicos estean dotados de infraestrutura axeitadas para o subministro de enerxía a estes vehículos.

Por elo propón ao Pleno da Corporación a adopción dos seguintes acordos:

1. Estudar a posibilidade de que quede establecida a obrigatoriedade en todo edificio de nova construción para o que se pida licenza de dotar aos garaxes da infraestrutura básica necesaria que posibilite a recarga das baterías dos automóviles eléctricos.

2. Facilitar, naqueles edificios cuxos garaxes non estean dotados desta infraestrutura, a instalación das mesmas ás comunidades que así o requiran.

3. Iniciar os estudos técnicos necesarios para xeralizar a instalación de puntos de recarga nos edificios públicos do concello de Cabanas (Casa do Concello, CEIP Eladia Mariño, Pavillón de Lavandeira, Escola Laica...).

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira manifesta que despois de aprobar bonificacións no imposto sobre vehículos de tracción mecánica, os acordos que se propoñen son asumibles, estudar esas posibilidades de puntos de carga para así promocionar estes vehículos.



Polo grupo Mixto: a concelleira de AEC María Eva García Amor parécelle boa idea, pero a realidade é outra, mentres non se desenvolva unha lexislación estatal parécelle riscado e custoso abordar estas iniciativas, ademais o parque móbil é escaso, nas grandes cidades están dando os primeiros pasos a través das empresas distribuidoras, habería que estudar si este tema é viable na administración local.

Polo grupo Popular: o voceiro Manuel González López parécelle unha ocorrencia sen pensar as consecuencias, sería bo que repasar as competencias municipais na lei reguladoras das bases do réxime local, artigo 7.4, por outra banda nos está a propoñer unha actividade económica para o concello de Cabanas, cada administración ten que procurar exercer as competencias que lle corresponden, no punto 1 non hai normativa que regule a obrigatoriedade de instalar puntos de recarga en novas construcións e no punto 2 non hai impedimento para instalar a infraestrutura nos garaxes que o soliciten.

O Sr. Feal Pereira reitera o apoio a esta moción e estudar a posibilidade destas novas necesidades se vaian transcribindo a normativa, pode que non se poida obrigar as novas construción pero que o diga un informe técnico, os acordos son claros e hai que ser ambiciosos cara o futuro, felicita ao concelleiro do BNG pola iniciativa.

O concelleiro do BNG Iago Varela Martínez agradecer o apoio do voceiro socialista e indica que a proposta non fixa un espazo temporal, permite ao concello non sobrecargar os servizos municipais, trátase dunha iniciativa política que pretende avanzar no uso de formas de transporte máis respectuoso co medio ambiente, polo tanto debemos ir iniciando os estudos técnicos para levar a cabo a proposta.

A Sra. García Amor considera que o Sr. Iago Varela equivocouse de concello, tería que ser un concello máis grande onde a iniciativa fose posible, referíndose a iniciativa das empresas comercializadoras dos vehículos, non que se pague con fondos públicos.

O Sr. Varela Martínez pide a palabra por alusións, e a Presidencia que non procede, o feito de manifestar o contrario da proposta non é motivo de alusión.

O Sr. González López recorda que ademais do exposto anteriormente serían necesarios informes vinculantes da administración competente na que sinala a inexistencia de duplicidade, e reitera a lexislación anterior, o cobro da enerxía para os puntos de recarga o debe facer unha empresa dada de alta como xestor da carga, a opción que propoñen e compartindo gastos co concello.

O concelleiro de PDDdG Xosé Manuel Pérez Sardiña considera que para facer estudos non é necesaria unha moción, hai que facelos e o concello ten outras prioridades, agora mesmo isto non é algo xeneralizado, habería que pedir informes xurídicos previos para ver a normativa concreta, ver primeiro o que se pode facer, a moción tal como está non a pode aprobar.

Despois de debatido o asunto, o Pleno da Corporación en votación ordinaria, con tres votos a favor dos membros do grupo Socialista e concelleiro do BNG, seis en contra dos membros do grupo Popular e concelleira de AEC, e unha abstención do concelleiro de PDDdG, acorda rexeitar a proposta presentada polo concelleiro do BNG.

7.- COMPARECENCIA EN PLENO SOBRE ACTUACIÓNS DE CARA CELEBRACIÓN DO “ANO DE ANDRES DO BARRO”. PROPOSTA CONCELLEIRO DO BNG. Vista a proposición de comparecencia en pleno sobre as actuación de cara a celebración do



“Ano Andrés do Barro”, presentada polo concello do BNG Iago Varela Martínez na que fai referencia a moción presentada no pleno ordinario realizado o 25 de novembro de 2015, a cal foi aprobada co engadido da concelleira do grupo Popular Esperanza Gayoso Pereiro, e propón a adopción dos seguintes acordos:

1. Que a responsable da área implicada no goberno municipal compareza publicamente neste pleno para informar sobre o estado das actuacións para a celebración do 2017 como Ano Andrés do Barro e o grao de cumprimento da moción aprobada polo pleno do 25 de novembro de 2015.

A continuación, toma a palabra a concelleira delegada de cultura Esperanza Gayoso Pereiro indicando que se está traballando na programación cultural de 2017, manteñen reunións coas asociacións do concello para elaborar o calendario e sobre este tema teñen varias alternativas que cando estea pechado o traerán para a súa presentación no pleno; este homenaxe non ven solo proposto polo grupo de goberno senón que foi aprobado por tódolos membros da Corporación, por iso agradecería que presentaran suxestións para incluír na programación; no pleno de 25-11-2015 está recollido o de nomeamento dunha praza unha vez sexa concedida a medalla de Galicia.

8.- ORZAMENTOS PARTICIPATIVOS. PROPOSTA CONCELLEIRO DE PDDdG. Vista a proposta do concelleiro de PDDdG sobre orzamentos participativos, en cuxa exposición de motivos alude as novas publicadas polo Concello de Cabanas nas que chama aos veciños a facer propostas para os orzamentos participativos, as cales non se corresponden coa realidade xa que son feitas desde o grupo de goberno sen ter en conta a oposición e sen que despois as teñan en conta, lamenta que esta propaganda se sega a pagar con cargo á maior suba de impostos, nunca o goberno local comunicou as decisións tomadas sobre as suxestións veciñais. Fronte a esta situación consideran que para participación real deberíase facilitar a asociación e grupos políticos o orzamento por partidas e programas, para orzamentos participativos a Corporación debía convocar asembleas veciñais por parroquias co diñeiro asignado e logo os veciños priorizarían.

Por todo o exposto, propón ao Pleno da Corporación os seguintes acordos:

1. Que o goberno local lles achegue aos grupos políticos e ás asociacións municipais o borrador de orzamento para o exercicio seguinte desagregado por partidas e programas, acompañado dun resumo dos principais gastos e investimentos do exercicio en curso

2. Que os portavoces municipais poñan en marcha asembleas veciñais abertas co fin de establecer as asignacións e as prioridades de cada parroquia, de cara a ser incluídas nos orzamentos de 2017 e seguintes.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira manifesta que todo o que sexa para maior participación da veciñanza será ben acollido, teñen reiterado ao grupo de goberno consensuar os orzamentos coa oposición, elo significa achegar borrador a tempo, están de acordo co punto 1, non entenden moito o dos voceiros, si se refire a que desde o concello se establezan reunións formais coa veciñanza cos grupos da oposición estarían de acordo, non que os voceiros fagan esas reunións.

Polo grupo Mixto: o concelleiro do BNG Iago Varela Martínez aclara que é unha proposta do Sr. Pérez Sardiña non do grupo Mixto en conxunto, inda que está de acordo con moito do exposto, as reunións veciñais que fai o Concello son un paripé partidista, confunden Concello e



partido, tampouco é de recibo facer reunións antes de saber as liñas do orzamento e a día de hoxe a oposición non ten borrador do orzamento de 2017, apoiarán a moción porque xa fixeron reunións e faláron e faláran coa xente apróbese ou non a moción.

A concelleira de AEC María Eva García Amor está de acordo co punto 1, é función do goberno dar publicidade aos investimentos, en canto ao punto 2 xa se fixeron xuntanzas veciñais polas parroquias tanto o goberno como algún concelleiro, as reunións ía todo o mundo inda que estaría ben que o resto dos concelleiros souberan as propostas desas reunións.

O concelleiro de PDDdG Xosé Manuel Pérez Sardiña indica que os concelleiros como tales non poden presentar proposta por iso o fai dentro do grupo Mixto como xa especifica, é unha cuestión formal; hai unha xunta de voceiros na que se poder facer estas cousas, parécelle ben que cada quen faga as súas reunións, pero quere que as propostas dos veciños teñan o rango que deben ter, que as coñezan todos, é unha proposta que pretende claridade e participación aberta.

Polo grupo Popular: o voceiro Manuel González López recorda que a responsabilidade de presentar os orzamentos é do grupo de goberno, desde o 2007 veñen convocando aos veciños das parroquias para solicitar as súas suxestións, a vostede gustaríalle que gobernasen de costas aos veciños pero é a eles a quen hai que render contas, houbo proposta de saneamento, mellora camiños, alumados, actividade terceira idade, actividades escolares, etc., no tema económico o Sr. Pérez Sardiña tivo oportunidade na lexislatura 2003-2007 de facer algo importante para este concello e non a aproveitou, vostede solo fala dun ou dos apartados dos orzamentos, non fala de cultura, investimentos, servizos sociais, deportes, educación, o grupo de goberno está aberto a escoitar propostas do resto dos grupos políticos, e darase proposta dos orzamentos cando sexa preceptivo.

O Sr. Pérez Sardiña indica que os orzamentos veñen a Pleno despois da comisión de Facenda, o Pleno ten todo dereito de demandarlles información e dicirlles porque non se fan asembleas conxuntas, parécelle ben que se cada un faga reunións, pero si o Pleno é quen vai aprobar sería máis serio facelas de forma conxunta.

O Sr. Alcalde recorda que esas reunións son públicas, non se lle priva a ninguén de asistir.

A Sra. García Amor puntualiza que no punto 1 está de acordo, pero no punto 2 entende que as xuntanzas xa se fixeron, gustaríalle que se dera conta do que se propuxo nesas xuntanzas.

O Sr. Alcalde indica que como tódolos anos van a falar cos grupos e presentar o orzamento, vaise aprobar no pleno pero van a pasar propostas sen problema, están abertos a reunións e estudar propostas de obras de interese xeral, prioritarias e de competencia municipal.

O Sr. Pérez Sardiña acepta o engadido da Sra. García Amor en relación co punto 2.

A continuación prodúcese unha deliberación entre o Sr. Pérez Sardiña e o Sr. Alcalde sobre a votación por puntos e posibles modificacións.

A seguir sométese a votación a proposta do punto 1 co engadido e do punto 2, co seguinte resultado:

Votación do punto 1, cinco votos a favor dos membros do grupo Socialista e do grupo Mixto, cinco votos en contra dos membros do grupo Popular, producíndose empate repítese a votación co mesmo resultado, polo que decide o voto da Presidencia e queda rexeitado.

Votación do punto 2, catro votos a favor dos membros do grupo Socialista, concelleiro do BNG e concelleiro de PDDdG, seis votos en contra dos membros do grupo Popular e concelleira de AEC, quedando rexeitado o punto 2.



9.- IMPLANTACIÓN DE MEDIDAS CONTRA A POBREZA ENERXÉTICA. PROPOSTA CONCELEIRO PDDdG. Dáse conta da proposta do concelleiro de PDDdG sobre implantación de medidas contra a pobreza enerxética, en cuxa exposición de motivos fai referencia aos criterios para determinación da situación de pobreza enerxética: que máis do 10% dos ingresos do fogar se dediquen ao pagamento do consumo doméstico de enerxía e que o fogar sexa incapaz de manter unha temperatura adecuada na vivenda no inverno. Segundo estes criterios sinalan que a pobreza enerxética no país é moi alta, que se agravou pola crise económica, ademais a liberalización do sector eléctrico derivou nun aumento desproporcionado do prezo da electricidade que é un ben social básico, a isto hai que engadir que o iver que se aplica é do 21%; fai mención a última enquisa do Ine en Galicia e a responsabilidade dos gobernos e administracións públicas para achegar solucións fronte á pobreza enerxética, tamén alude as directivas do Parlamento Europeo e do Consello, o ticket enerxético da Xunta e a situación no Concello de Cabanas, propoñendo por todo elo ao Pleno da Corporación a adopción dos seguintes acordos:

1. Impulsar un plan de emerxencia enerxética para o inverno no que, seguindo as recomendacións da Unión Europea, se eviten en Cabanas os cortes de subministracións enerxéticas entre os meses de outubro a abril. Neste sentido, instamos ao goberno local a establecer convenios de colaboración entre o concello e as empresas subministradoras de enerxía para que estas comuniquen con antelación o corte aos servizos sociais municipais.

2. Instar ao goberno local para que os servizos sociais redacten un estudo rigoroso sobre a pobreza enerxética no noso concello e consecuentemente impulse unha campaña informativa dando a coñecer as axudas existentes para que as familias en situacións de dificultade poidan afrontar o pagamento das subministracións.

3. Instar ao goberno local a aumentar de forma substancial a partida orzamentaria destinada a Emerxencia Social para adecuar as axudas sociais ao número de familias que se atopan en situación de pobreza enerxética.

Dáse conta tamén da emenda presentada polo concelleiro do BNG para engadir dous puntos:

4. Solicitar do Goberno do Estado español que permita a creación dunha Tarifa Eléctrica Galega que, atendendo á condición de Galicia como excedentaria na produción de electricidade, posibilite unha menores tarifas tanto para o consumo doméstico como para as empresas.

5. Traballar coa Fundación Axencia Provincial da Coruña (FAEPAC) e establecer unha liña de colaboración cos servizos sociais do Concello que permita elaborar auditorías enerxéticas para a elaboración de propostas de aforro que permitan reducir o consumo mantendo o nivel de confort no fogar na loita contra a pobreza enerxética.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira puntualiza que o tema de Cabanas se pode englobar ao resto da poboación, hai pobreza enerxética porque non hai recursos para pagar a enerxía, paro crónico, pensións baixas, focos de exclusión social, vivendas con mala eficiencia enerxética, nestes puntos e onde hai que incidir, está de acordo cos puntos da moción e os da emenda, alude a importancia dos servizos sociais, pedíronlle informe a estes servizos municipais que consideran necesario pero leva o seu tempo, pide impulso de políticas que melloren esta situación como salarios, mellora eficiencia enerxética, loita contra exclusión social, etc.



Polo grupo Mixto: o concelleiro do BNG está de acordo co espírito da moción, non é de recibo que mentres as grandes eléctrica reparten dividendos e portas xiratorias haxa tanta xente que non pode pagar luz ou calefacción e morre de frío; os gobernos locais non só deben apoiar a persoas necesitadas senón que tamén deben impulsar iniciativas ante o Estado ou Xunta de Galicia para atender aos máis necesitados, refírese a tarifa eléctrica galega que demanda o BNG e os traballos que impulsa a Deputación sobre a FAEPAC co obxecto de apoiar aos concellos en proxectos contra a pobreza enerxética, Cabanas non pode perder esta oportunidade para ser de pobreza enerxética cero, e para completar a proposta presenta a emenda para engadir os dous puntos.

A concelleira de AEC María Eva García Amor indica que a vista da proposta informouse en servizos sociais tanto da demanda como dos requisitos para solicitar axuda, existe un protocolo de actuación para casos de corte de subministro estando obriga a compañía a comunicarllo aos servizos sociais, de momento non houbo ningún, o mellor é necesario unha campaña informativa; no punto 2 habería que puntualizar o estudo dos servizos sociais xa que é difícil e non conta con moito persoal, habería que consensuar a forma de facelo, gustaríalle o compromiso de incremento da partida de emerxencia social en caso de necesidade.

O concelleiro de PDDdG Xosé Manuel Pérez Sardiña agradece as intervencións, está de acordo en que hai que ter cero cortes de luz; non se había pronunciado sobre a emenda porque non se había explicado, indica que o punto 4 non corresponde ao concello e o 5 relativo a traballar coa FAEPAC pregúntase si é prioritario reducir o consumo ou evitar que lle corten a luz, habería que estar un pouco pendente do estudo dos servizos sociais, o que si está claro é que si cortan a luz hai un problema, débese tratar que as empresas asinen convenios, polo tanto non ve necesario o punto 5 porque hai técnicos municipais para unhas medidas básicas, non vai impedir a votación polo tanto que se voten por separado.

Polo grupo Popular: o voceiro Manuel González López non pode estar en contra de medidas de apoio a persoas en risco de exclusión social, moitas nestes anos de crise o pasan mal, o concello é coñecedor desta problemática e sempre estarán en disposición de resolver problemas dos veciños/as de Cabanas; non están de acordo con varios parágrafos da exposición de motivos, con relación a pobreza enerxética no concello de Cabanas, segundo a AT a renda percápita sitúa a Cabanas no 8º lugar dos concellos de Galicia, en canto ao paro está no 6,3%, os servizos sociais municipais informan e asesoran a veciñanza e coñecen as necesidades, o convenio coas empresas eléctricas está operativo desde decembro de 2015, o protocolo asinado establece colaboración entre a Consellería e as empresas comercializadoras, alude a orde do 28-12-2015 sobre axudas e suspensión de cortes; en relación co punto 2 reitera que os servizos sociais coñecen as necesidades e tramitan as axudas necesarias, en canto a estudo hai medios limitados e falta de colaboración da veciñanza de ofrecer datos privados, a partida de emerxencia social nunca se limitou e de ser necesario se incrementa, por outra banda hai que evitar duplicidades con outras administracións, por todo elo votarán en contra, a súa proposta é facer estudo rigoroso e informar a tódolos veciños sobre axudas para a pobreza enerxética.

O Sr. Varela Martínez di que poden parecer excesivos estes puntos e refírese as políticas que veñen establecendo os concellos que goberna o BNG contra a pobreza enerxética, desafiuzamentos e baixas na administración, empregando a actividade económica do concello como medida de presión contra os bancos e as subministradoras; considera que as emendas son



competencia do concello e o punto 5 garante dotación económica e persoal para facer os estudos enerxéticos, pobreza enerxética non é solo corte de luz, tamén é pagala.

A Sra. García Amor considera que están xustificadas as medidas da proposta, ten dúbidas coas da emenda, non están debidamente xustificadas.

O Sr. Pérez Sardiña insiste en que ao voceiro popular non lle axuda nada quen lle escribe, en Cabanas hai tres pequenas empresas de subministración e solo mencionou as grandes, por iso esa información sería máis doado intercambiala a nivel local, os estudos fanse nos propios concellos e hai persoal capacitado neste concello para facelos, reitera votar os puntos 1 a 3 en bloque e despois o 4 e 5.

O Sr. Alcalde aclara que as tres empresas as que se fixo mención están agrupadas en CHC e polo tanto teñen protocolo asinado coa Xunta, o concello non ten competencia niso, terá que vixiar que se cumpra, en canto ao estudo o mellor é redactar escrito informando a tódolos veciños e o que teña dúbidas que pase polos servizos sociais, se non chega o diñeiro consignado para emerxencia ampliarse, o punto 1 non poden votar a favor porque xa se está facendo.

A continuación prodúcese un debate entre o Sr. Pérez Sardiña e o Sr. Alcalde sobre a firma de convenio coas tres empresas cabanesas e a realización dun estudo sobre a pobreza enerxética, así como votación dos puntos da proposta, despois do cal, sométese o asunto a votación co seguinte resultado.

Votación do punto 1. engadindo con informe xurídico, dez votos a favor de tódolos membros presentes, polo que queda aprobado.

Votación do punto 2, engadindo consensuado con servizos sociais, cinco votos a favor dos membros do grupo Socialista e do grupo Mixto, cinco votos en contra dos membros do grupo Popular, producíndose empate repítese a votación co mesmo resultado, polo que decide o voto da Presidencia e queda rexeitado.

Votación do punto 3, catro votos a favor dos membros do grupo Socialista, concelleiro do BNG e concelleiro de PDDdG, cinco en contra dos membros do grupo Popular e unha abstención da concelleira de AEC, polo que queda rexeitado.

Votación punto 4, catro votos a favor dos membros do grupo Socialista, concelleiro do BNG e concelleiro de PDDdG, cinco en contra dos membros do grupo Popular e unha abstención da concelleira de AEC, polo que queda rexeitado.

Votación punto 5, tres votos a favor dos membros do grupo Socialista e concelleiro do BNG, cinco en contra dos membros do grupo Popular e dúas abstencións da concelleira de AEC e do concelleiro de PDDdG, polo que queda rexeitado.

10.- INTOLERANCIA AO GLUTE. PROPOSTA GRUPO SOCIALISTA. Vista a proposta do grupo municipal Socialista sobre a intolerancia ao glute, na cal expón que segundo estudos da Federación de Asociacións de Celíacos de España unha de cada 150 persoas é intolerante ao glute do trigo, cebada, kamut, avea, triticale e centeo, o que se coñece como celiaquía, fai referencia a enfermidade autoinmune e que o único tratamento é a dieta sen glute, non sempre é posible encontrar alimentos sen glute e ademais son máis caros, fala dos custos que isto supón, falta de axudas, falta de información adecuada en establecemento hostaleiros, e necesidade de apoio polas institucións.



Por todo elo o grupo municipal Socialista propón ao Pleno da Corporación a adopción dos seguintes acordos:

1. Declarar o apoio unánime do Concello de Cabanas aos enfermos celíacos, familiares, asociacións e resto de axentes cos que interactúan.

2. O Concello de Cabanas instará á Xunta de Galicia e ao Goberno de España a establecer políticas para a normalización e igualdade das persoas celíacas que inclúan a elaboración dun catálogo de alimentos sen glute gratuito e de libre acceso, as provisión de información sobre a enfermidade celíaca en centros educativos, residencias de anciáns, e calquera outro organismo público de características similares e o apoio a investigación médica pública sobre a celiaquía.

3. O Concello de Cabanas facilitará menús libres de glute aptos para celíacos en aqueles servizos da súa competencia e en eventos organizados polo Concello.

4. O Concello de Cabanas incluírá na súa páxina oficial aqueles establecementos hostaleiros que incorporen nas súas cartas de servizos, alimentos sen glute para celíacos, así como en futuras guías que se elaboren no Concello.

5. Que se estableza unha nova liña de axudas municipais, ata a implementación dun plan de alcance superior Autonómico ou Estatal, para as familias celíacas do Concello e para elo se encargue aos servizos técnicos municipais a redacción das bases que teñen que regular a concesión de ditas axudas así como destinar unha partida orzamentaria para o ano 2017.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Mixto: o concelleiro do BNG Iago Varela Martínez considera interesante a proposta do grupo Socialista e non supón grandes esforzos ao Concello, así como daría valor engadido ao sector turístico e económico, vota en falta referencia específica ao comedor escolar, por elo propón a modificación do punto 3 “O concello de Cabanas facilitará menús libres de glute aptos para celíacos naqueles servizos da súa competencia no colexio e nos eventos organizados polo Concello”.

A concelleira de AEC María Eva García Amor manifesta o apoio a enfermos celíacos, familiares, etc., así como a tódolos enfermos crónicos, non entende porque se pide axuda solo para celíacos, desde servizos sociais se debía de incluír a tódolos enfermos crónicos, e de ser necesario aumentar a partida o ano que ven, no colexio xa está cuberto o do comedor escolar que non xestiona o Concello.

Polo grupo Popular: o concelleiro Javier Fernández Brage fala dos atrancos que atopan os que sofren esta doenza, están de acordo co punto 1 e expresan o apoio as persoas que sofren a doenza directa ou indirectamente, no punto 2 todos os asuntos que teñen como fin instar a administración superior non son de competencia municipal, sería bo facer unha revisión a tratar polos voceiros para unha resposta común, no punto 3 non hai inconveniente sempre que o soliciten con antelación, no punto 4 non cree que sexa competencia do Concello, están de acordo co da futura guía cunha lista completa, e no punto 5 cren que ata que a Xunta ou o Goberno central non aplique esas posibles axudas, neste Concello calquera persoa que o solicite e cumpra unha serie de requisitos esenciais pode acceder a axudas a través do fondo de emerxencia social. Non terían inconveniente en aceptar a moción si: punto 3, dicir que se facilitarían menús sempre e cando haxa demanda, punto 4, incluír nunha guía do Concello os establecementos que inclúan menús para celíacos e modificar o relativo a incluír na páxina oficial estes negocios xa que non



podemos facer distinción, e no punto 5, que estas axudas poidan levarse a cabo a través do fondo de emerxencia social.

Polo grupo Socialista: a concelleira Concepción Rodríguez Ferreiro manifesta que unha persoa celíaca o único tratamento é unha dieta sen glute, mentres que outros enfermos teñen tratamento, non se pode meter a tódolos enfermos crónicos no mesmo grupo, se non é da nosa competencia instar a outras administración fagámolo desde aquí, en canto a que se esixa a demanda as persoas celíacas non poder tomar glute pero o resto si, debe procurarse facer cousas aptas para todos, considera que debe incluírse partida orzamentaria aparte da de emerxencia social, ser celíaco ao mellor non está en situación de emerxencia social, o da guía pode valer e pensa que axudaría a facer Cabanas concello turístico.

A Sra. García Amor bota en falta o poñer uns topes, entende que debe axudarse a xente que de verdade o solicite, aparte que hai outro tipo de intolerancias como a lactosa por exemplo.

A Sra. Rodríguez Ferreiro indica que xa dixeron que se encargaran os servizos técnicos municipais de organizar as bases, de todas formas no rexistro de celíacos de Galicia solo hai catro familias de Cabanas, non sería a ruína do Concello.

O Sr. Pérez Sardiña ve o maior problema incluír a uns e outros non na páxina web, a solución incluír todos e facer referencia aos locais para celíacos, no tema económico é importante ter en conta os recursos da familia, apoia a moción con esas salvidades.

O Sr. Fernández Brage en canto o punto 3 cree inviable facer unha serie de menús, ofrecelo a xente que lle interese e o comunique para ter unha cifra concreta.

O voceiro do grupo Socialista Sr. Feal Pereira indica que se busca prever unha situación onde hai un menú con glute que haxa a posibilidade de un sen glute, que haxa información.

A concelleira do grupo Popular Sra. Gayoso Pereiro púxose en contacto con establecementos de restauración e dixéronlle que están obrigados a ter carta de aléxenos, non ten porque colgarse na páxina web, no punto 2 no relativo a eventos non hai problema, sempre se conta coas persoas que teñen algunha intolerancia, porque se pode falar tamén doutras intolerancias.

Despois de distintas intervencións sobre a redacción final da proposta a votar, o Pleno da Corporación en votación ordinaria, co voto a favor dos dez membros presentes dos once que o compoñen, acorda:

1. Declarar o apoio unánime do Concello de Cabanas aos enfermos celíacos, familiares, asociacións e resto de axentes cos que interactúan.

2. O Concello de Cabanas instará á Xunta de Galicia e ao Goberno de España a establecer políticas para a normalización e igualdade das persoas celíacas que inclúan a elaboración dun catálogo de alimentos sen glute gratuito e de libre acceso, as provisión de información sobre a enfermidade celíaca en centros educativos, residencias de anciáns, e calquera outro organismo público de características similares e o apoio a investigación médica pública sobre a celiaquía.

3. O Concello de Cabanas facilitará menús libres de glute aptos para celíacos en aqueles servizos da súa competencia e en eventos organizados polo Concello previa solicitude.

4. O Concello de Cabanas incluír na súa páxina oficial un listado de establecementos hostaleiros indicando aqueles que inclúan menú para celíacos, así como nas futuras guías que elabore o Concello.



11.- DECLARACIÓN INSTITUCIONAL CONTRA A VIOLENCIA DE XÉNERO. Dende o Concello de Cabanas sumámonos, un ano máis, xunto aos estados, as rexións e entidades locais de todo o mundo, á conmemoración do día 25 de novembro, Día Internacional para a Eliminación da Violencia contra as Mulleres, co fin de manifestar o máis enérxico rexeitamento ante calquera tipo de violencia de xénero, e, así mesmo, renovar o seu compromiso de colaborar e impulsar accións cuxo fin sexa a erradicación da gran lacra social que supón a violencia contra as mulleres e as nenas.

Este tipo de violencia é unha das vulneracións máis graves dos dereitos e liberdades. Nesta sociedade legalmente igualitaria, cun marco xurídico que nos sitúa na vangarda dos países do entorno, as cifras de mortes e agresións contra as mulleres e as nenas seguen sendo abrumadoras, e, ano tras ano, indícanos que hoxe máis que nunca é necesario incrementar os esforzos e erradicar aquelas actitudes e comportamentos cotidianos que reproducen a desigualdade e que están na orixe da violencia de xénero, contribuíndo a perpetuala.

A superación deste tipo de violencia é moi complexa pero se inicia atallando a desigualdade histórica entre homes e mulleres, abordándoa dende un compromiso real, ca implementación de medidas integrais eficaces que se traduzan en políticas preventivas e de intervención dende as idades máis temperás.

A experiencia confirma que canto máis preto están administración e cidadanía, máis eficaces son as medidas de sensibilización, de educación, ou de detección precoz, e máis eficaz é a resposta de urxencia ou o seguemento dos servizos. Na suma, obtéñense mellores resultados na loita contra a violencia de xénero.

Conscientes disto, as administracións locais foron implementando normas e plans con medidas específicas que favorecen a igualdade de oportunidades, introducindo, na maioría dos casos, a igualdade de xénero como paradigma de progreso.

Sen embargo, a pesar do avance, o feito de que a violencia machista perdure é deleznable polo que debemos seguir traballando. É por iso que, se nos convoca a tódolos concellos a que neste día:

- Incluamos a Violencia de Xénero na axenda política como un problema prioritario.
- Reforcemos os esforzos para a implementación de políticas integrais contra a violencia de xénero, deseñadas dende a defensa dos dereitos das mulleres e dirixidas a promover a igualdade de oportunidades entre homes e mulleres como un paso adiante para a transformación social necesaria para superar esta lacra social.
- Levemos a cabo campañas preventivas, e con especial incidencia as dirixidas á poboación infantil e adolescente, en colaboración coas comunidades e axentes educativos.
- Promovamos acordos, dende tódolos grupos políticos, co fin de que existan medidas de prevención e de protección eficaz, así como as medidas que sexan necesarias para loitar con tódolos medios contra este tipo de violencia.

PARTE DE CONTROL ÓRGANOS DA CORPORACIÓN.

12.- INFORMES DA PRESIDENCIA.

a) Resolucións da Alcaldía. Dáse conta das resolucións ditadas desde a número 512 do 21-10-2016 ata a número 565 do 25-11-2016.



b) Informe sobre a execución trimestral 3ºT/2016. Dáse conta da comunicación dos datos de execución do orzamento no 3ºT de 2016 remitida ao Ministerio de Facenda e Administracións Públicas, Secretaría Xeral de Coordinación Autonómica e Local, en cumprimento das normas establecidas ao efecto.

c) Informe trimestral sobre a morosidade 3ºT/2016. Infórmase dos datos PMP 3º T/2016 remitidos ao Ministerio de Facenda e Administracións Públicas, Secretaría Xeral de Coordinación Autonómica e Local en cumprimento do establecido no artigo 4.1 b) da Orde HAP/2105/2012, do 1 de outubro.

d) Delegacións da Alcaldía. Dáse conta do Decreto 571/2016 polo cal se modifican as delegacións no primeiro tenente de Alcalde Manuel González López, así como, se efectúa delegación especial na concelleira María Eva García Amor en materia de servizos.

13. ROGOS E PREGUNTAS.

a) Preguntas orais.

a.1. Grupo Socialista: Intervención do voceiro Delfín Feal Pereira.

a.1.1. Hai oferta de emprego público do concello de Cabanas, por que non se inclúen tódalas prazas?

Resposta Alcalde: é un asunto que xa se falou cos traballadores, todo aquel que queira que se saque a praza estamos dispostos a sacala, hai algúns que non están inda nas condicións de querer que se lles saque a praza.

O Sr. Feal Pereira insiste en que deberían incluírse na oferta de emprego público todas as prazas que están en situación interina sen facer discriminación.

a.1.2. Temos constancia de habilitación dun teléfono de emerxencia via WhatsApp, quen vai xestionar este teléfono de emerxencias?, estamos ao día en cumprir tódalas normativas en materia de protección de datos?.

Resposta Alcalde: é un teléfono que non se esixe que se identifique a xente, soamente suxestións, información ou calquera problema como alumado público, fochancas nas estradas, non ten porque identificarse e polo tanto cumprimos a normativa, desde o concello o grupo de goberno vai xestionar, se recibe a mensaxe ou suxestión e pásase a delegación correspondente.

a.2. Intervención do concelleiro do BNG Iago Varela Martínez.

a.2.1. Sobre o teléfono do veciño, antes de nada felicitar ao goberno local por copiar a idea do BNG, quen se vai encargar con nomes e apelidos de usar e atender ese teléfono?.

Resposta Alcalde: xa lle contestou ao Sr. Feal Pereira, non cree que sexa necesario dar nomes e apelidos, é o equipo de goberno?.

- Quen paga ese teléfono?

Resposta Alcalde: é do concello e págase con cargo ao orzamento da partida dos teléfonos, non hai teléfono novo, é un teléfono que xa había no Concello e habilitouse para iso.

a.2.2. Tivemos constancia dunha denuncia veciñal sobre o estado do patrimonio histórico do Concello (Coto do Castro do Salto) afectado por unha plantación de eucalipto, leva o Concello algún tipo de control ou seguimento do estado deste tipo de patrimonio para garantir que non se realizan actividades que afecten ao seu estado de conservación?.



Resposta Alcalde: métese en cousas que sabe que é un tema privado, iso non é público, é unha propiedade privada e debe diferenciar o que é privado do que é público.

- Daquela o concello non está facendo nada de seguimento do patrimonio histórico do Concello, levan algún control?

Resposta Alcalde: o goberno está facendo cousas pero hai que regulalas, no que nos corresponde si.

a.2.3. Rogo. Xa o fixo neste pleno pero non escoitan, a bandeira galega do mástil do Concello leva meses colgada ao revés, teñan a ben xa que agora son tantos no goberno, cambiar a bandeira e poñela no sentido correcto.

Resposta Alcalde: están solicitadas bandeiras novas e se colocaran como se teñan que colocar.

a.3. Intervención do concelleiro de PDDdG Xosé Manuel Pérez Sardiña.

a.3.1. Están en funcionamento as placas solares que ten o Concello?

Resposta Alcalde: inda non.

a.3.2. No parque infantil fronte ao Concello pediu a retirada de postes antigos e seguen colocados, un no medio das escaleiras de subida, teñen previsto retirar eses postes?

Resposta Alcalde: si.

a.3.3. En Laraxe chegou a auga pero máis arriba da Pedra do Couto hai un depósito de auga e atopámonos que está comido polas silvas e levaron o peche que había, está totalmente abandonado, coñecen a situación deste depósito?

Resposta Alcalde: si, está feita a denuncia

a.3.4. Rogo. No pleno anterior queixei-me da “fonte” de Formarís que sae do saneamento, un mes despois segue o mesmo, rogaríalle que requira á concesionaria para que vaia a reparar o atascamento, o punto exacto 43, 42, 98, 301. -8, 14, 88, 93 3.

a.3.5. No Barreiro tamén hai un problema semellante, na pista que sobe do colexio tamén se produce un atascamento continuo, non é unha fonte, é o saneamento, o sitio é 43,42, 70 052 e -8 171 05 74.

b) Preguntas por escrito.

b.1. Preguntas presentadas polo concelleiro do BNG Iago Varela Martínez en escritos de data 29 de novembro de 2016.

b.1.1. Na praia da Madalena, aproximadamente á altura do Club Náutico La Penela, emerxe unha tubaxe parcialmente soterrada que verte líquido ao mar.

Ante esta cuestión, desde o BNG desexamos ter resposta ás seguintes cuestións.

1. Ten coñecemento o goberno municipal desta cuestión?

2. En caso afirmativo, de onde procede esa tubaxe? A quen pertence? Que tipo de contido verte? É legal?

3. En caso negativo, pode comprometerse o señor alcalde a investigar o tema e ter respostas a esta cuestión no seguinte pleno?

Resposta Alcalde: non ten coñecemento e démoslle traslado a Viaqua.



b.1.2. Recentemente este concello acolheu a exposición itinerante dos traballos presentados ao IX Premio de Banda Deseñada Castelao, impulsado pola Deputación da Coruña, entre os que estaba “O inferno do debuxante”, asinado por Kiko Da Silva e gañador do certame.

A sede escollida para esta exposición no noso concello foi a Escola Laica, a pesar de que en ocasións anteriores o goberno municipal ten argumentado a súa mala situación de mantemento para negar o permiso para a realización de actividades na mesma. Na nosa visita comprobamos que o local presenta graves problemas de humidade, que fixeron que moitas láminas acusasen un grave deterioro durante a súa exposición no noso concello, ao que hai que sumar un estado de sucidade do local inadmisibile.

Ante esta cuestión, desde o BNG desexamos ter resposta ás seguintes cuestións:

1. Visitou o señor alcalde a exposición?
2. Considera o señor alcalde que é normal que unha exposición aberta ao público non cumpra uns mínimos de limpeza?.
3. Considera o señor alcalde que o estado actual da Escola Laica é o idóneo para acoller este tipo de exposicións ou actividades?.
4. Por que, sendo coñecedor do estado da Escola Laica, decidiu instalar esta exposición nesa instalación e non noutro local municipal con mellores condicións?.
5. Por que negan permisos, amparándose no seu mal estado, para realizar actividades na Escola Laica, e despois organizan actividades do Concello nese mesmo edificio?.
6. Ten previsto o goberno municipal levar a cabo algunha actuación no próximo exercicio para solucionar os problemas de habitabilidade da Escola Laica?.
7. Ten previsto o goberno municipal dar cumprimento á resolución plenaria que insta a que a Escola Laica sexa a Casa da Cultura de Cabanas?.

Resposta Alcalde:

1. Teño por costume ir a tódolos eventos.
2. Eu teño outra información.
3. Xa lle comentei en varias ocasións que me gustaría que estiver mellor, pero de todas formas vostede é demasiado negativo.
4. Parte da pregunta xa lla contestou, é o local que está preparado para ese tipo de exposicións.
5. está confundido.
6. Sí.
7. Hai algo que vostede non entendeu, a Escola Laica xa está considerada como casa de cultura, outra cousa é que cumpra o que non gustaría que cumprira.

b.2. Preguntas presentadas polo concelleiro de PDDdG Xosé Manuel Pérez Sardiña en escrito de data 29 de novembro de 2016.

b.2.1. Neste mes de novembro, o alcalde aprobou por decreto a oferta de emprego público para 2016. Que criterios empregou para concretar a oferta de emprego público para o 2016? Vanse cubrir as 6 prazas decretadas? Ten previsto o goberno local oferta de emprego público para 2017?

Resposta Alcalde: por suposto que se van cubrir, e para 2017 cando se aprobe o orzamento xa lle diremos o que se pretende facer.

b.2.2. A Dirección General de Carreteras do Estado achegou informe sobre o Plan Xeral de



Ordenación Municipal o pasado 22 de novembro e conclúe que informa desfavorablemente no referente á súa afección á Rede de Carreteras do Estado. Que correccións teñen previsto realizar sobre o Plan Xeral de Ordenación Municipal para axeitarse ao devandito informe? Ten previsto o goberno local á vista destas novas modificacións substanciais que se suman ás requiridas pola Xunta expoñer novamente o Plan Xeral ao público?

Resposta Alcalde: xa lle contestei antes a pregunta, o informe ao que vostede se refire xa vai chegar corrixido dende a Dirección General de Carreteras do Estado, foi un erro deles.

b.2.3. Ao rematar as viaxes do verán, "O Anduriño" recibiu unha nova reparación que ascende a preto de 2.000 euros. En que consistiu esta reparación? Cales foron os principais danos e cal é a causa pola cal o concello se ve obrigado ao mantemento dun ben xestionado por unha empresa? Canto diñeiro ingresou o concello polas viaxes?

Resposta Alcalde: recórdolle que o "Anduriño" é propiedade do concello, polo tanto é o que ten que facer o mantemento, levalo e sacalo da auga e reparalo despois das rotas, non lle pode dicir as cifras porque as preguntas chegaron hoxe e non me deu tempo a recoller datos.

b.e.4. Un mes máis atopámonos con 300 euros gastados en dous anuncios de publicidade. Pódenos explicar con que fin se fixeron anuncios en dous medios comarcais durante o último mes?

Resposta Alcalde: como corresponde aos eventos que se organizan ou se van organizar.

b.2.5. Advertimos na pasada sesión de outubro que na escola de Porto a zona máis próxima ao río está sen rozar. O goberno local limpou de brouzada esa zona do muro do CEIP Eladia Mariño contra o río Dana?

Resposta Alcalde: temos que revisar ese asunto para ver que necesidades hai na zona.

6. Tamén no pasado pleno de outubro preguntámoslle por escrito polos labores do asesor web e contestou que implantara o .gal na web municipal. Detectamos unha eiva cos enderezos novos de correo electrónico que rebotaban as mensaxes, pero o máis rechamante foi que a web cabanas.es segue sendo o portal principal, mentres cabanas.gal apenas redirecciona automaticamente para a anterior web. Por outra banda, a xestión da lei de protección de datos obriga a crear ficheiros públicos relacionados coa web que deben ser rexistrados por persoal do concello e a súa xestión debe ser de coñecemento público, sobre este asunto nada nos contestou. O asesor web cobrou 1.245,09 € neste mes pasado para facer unha redirección do .gal ao .es? O goberno local adoptou algunha medida para cumprir a Lei Orgánica de Protección de Datos no que respecta á web municipal?

Resposta Alcalde: é raro que vostede entendera o que lle queríamos dicir, segundo a Axencia Española de Protección de Datos, é preciso que se rexistre nun ficheiro público cando se proceda a creación dun ficheiro que conteña datos de carácter persoal tamén aqueles entes de personalidade xurídica que actúen no tráfico como suxeitos diferenciados e sexan responsables de datos de carácter persoal, polo tanto estase a facer; con respecto ao dominio web.gal, leva activado máis dun ano cando foi preciso renovar o dominio cabanas.es e creouse cabanas.gal, o que se fixo ao respecto este mes foi o cambio de tódalas contas de correo, así como, a sede virtual en conxunto coa Deputación, a veces non vai porque dependemos da Deputación.

b.2.7. Esta pasada semana o Concello de Cabanas enviou unha nota de prensa aos medios de comunicación para a creación do Teléfono do Veciño, que nos parece ben. Pero estamos preocupados porque consultamos a web a Axencia Española de Protección de Datos e non atopamos ningún ficheiro dado de alta do Concello de Cabanas, ningún. Quen é o titular do



teléfono publicado polos medios de comunicación? Coñece o alcalde que a LOPD prevé multas de ata 600.000 euros por non dar de alta ficheiros de datos de carácter público?

Resposta Alcalde: ao respecto do teléfono aplícase a mesma normativa que para a páxina web en materia de protección de datos de carácter persoal, pero é un teléfono de servizo de uso anónimo, ninguén ten que dar os seus datos para mandar unha mensaxe a ese teléfono, é público e é do Concello.

b.2.8. A Casa de Xan Ares leva desde o verán pendente dunha valoración e non tivemos coñecemento de ningún avance concreto sobre a súa situación, nin sinalización do perigo sequera. Cal é o resultado da valoración que se encargou? Que avances concretos se produciron desde setembro que non preguntamos?

Resposta Alcalde: as valoracións que presentaron os técnicos que se lles solicitaron son moi dispares, estamos pendentes de que o arquitecto municipal nos faga un estudo para esas valoracións, é algo bo que xa temos tódolos propietarios do inmovible localizados.

b.2.9. A última información que tivemos sobre a Casa do Teléfono, na vila de Cabanas, é un anuncio de execución subsidiaria que vai realizar o concello. Que xestións fixeron para coñecer o dono da propiedade? Que accións concretas ten previsto realizar cumprido o prazo de execución?

Resposta Alcalde: esa información está no expediente, e despois faremos as que correspondan.

b.2. 10. No pleno de outubro preguntámoslle pola parcela das Raiolas no Areal e comunicamos que o propietario é Caixabank SA que tomou posesión da tenza este pasado 20 de setembro. O concello non enviou comunicación a este propietario ata novembro, polo tanto cando lle preguntamos o concello non exixira ao propietario que limpase e rozase a parcela urbana. Hai algunha novidade sobre este asunto? Cando ten previsto o goberno local que se realice a limpeza da devandita tenza urbana?

Resposta Alcalde: creo que non é desde o mes de novembro nin de outubro, levamos case dous anos pelexando con ese tema e agora acabamos de pedirlle información ao xulgado sobre o propietario, sabemos que está no xulgado e que hai novo propietario.

b.2.11. No camiño das Modias, preto do Muíño de Cabalo, atopámonos con que o concello botou grava miúda sobre asfalto e sobre antigo aglomerado asfáltico. Que motiva que non se empregue aglomerado asfáltico en todos os camiños? Sabe o goberno local que debe sinalizar a existencia deste material para que os vehículos reduzan a velocidade?

Resposta Alcalde: esa obra está realizada segundo o proxecto e a sinalización corresponde a empresa que fai a obra.

b.2.12. Rogo. No Pleno de outubro advertímolos de problemas dunha fonte do Batán e comprobamos que o problema non se resolveu porque ao chover apózase a auga nela. Suxerímoslle que o concello amañe a fonte do Batán que está na beira do camiño para que desaugue normalmente ao río Dana.

b.2.13. Nos viais de servizo da AP9 e do vial das Pontes séguense producindo verteduras no último mes, a última foron uns cristais de vehículos. Por outra banda, o vertedoiro do Portiño seguiu medrando desde que llo comuniquéi o pasado ano 2015 sen que o goberno local adoptase ningunha medida concreta, tamén vimos como ás beiras dos camiños seguen a proliferar este tipo de verteduras, e iso que suxerín neste mesmo pleno un plan de erradicación destes focos de contaminación para evitar o efecto chamada fundamentalmente. Á vista do exposto, reitérolle a



CONCELLO
DE
CABANAS

suxestión de que fagan un censo de vertedoiros incontrolados e procedan á retirada do lixo que neles se amorea.

Resposta Alcalde: como sabe vostede xa se esta facendo, por tempadas pásase a retirar os vertedoiro que hai polo Concello, vamos intentar facer unha charlas sobre reciclaxe e ver si somos capaces de poñer a funcionar o punto limpo e con iso erradicar eses vertedoiros, esa é a parte que corresponde ao Concello, estamos a traballar niso, si pola nosa parte fora xa estaría funcionando.

A continuación a Presidencia levanta a sesión sendo as vinte e tres horas e dez minutos da cal estendo a presente acta, e do que eu Secretario, dou fe.

Vtº e praxe.

O Alcalde

O Secretario

